

**SEMAK  
MENGIKUT PENYAMPAIAN**

**EMBARGO  
SEHINGGA DISAMPAIKAN**

**UCAPAN BELANJAWAN 2021**

**OLEH:**

**YB SENATOR TENGKU DATO' SRI ZAFRUL TENGKU ABDUL AZIZ  
MENTERI KEWANGAN**

**KETIKA MEMBENTANG**

**RANG UNDANG-UNDANG PERBEKALAN (2021)**

**DI DEWAN RAKYAT**

**PADA JUMAAT, 06 NOVEMBER 2020**

**TEMA:**

**BELANJAWAN 2021: *TEGUH KITA, MENANG BERSAMA***

Datuk Yang di-Pertua,

**Saya mohon mencadangkan supaya Rang Undang-undang bernama “Suatu Akta bagi menggunakan sejumlah wang daripada Kumpulan Wang Disatukan untuk perkhidmatan bagi tahun 2021 dan bagi memperuntukkan jumlah wang itu untuk perkhidmatan bagi tahun itu dibaca bagi kali kedua sekarang.”**

## **MUKADIMAH**

1. *Bismillahirrahmanirrahim*, atas segalanya, kepada Tuhan kita memohon pertolongan dan petunjuk. Selawat dan salam serta seluruh puji-pujian buat junjungan besar Nabi Muhammad *Sallallahu alaihi Wassalam*. Begitu juga buat Datuk Yang di-Pertua, Ahli-ahli Yang Berhormat, serta seluruh rakyat Malaysia yang dikasihi.
2. *Alhamdulillah*, syukur ke hadrat Allah *Subhanahu Wataala*, saya diberi peluang untuk **membentangkan Belanjawan 2021** padakala negara serta seluruh isinya amat perlu dibantu.
3. Kepada saudara-saudari yang sedang melihat di kaca tv, yang mendengar di radio, atau yang menelaah di media baharu, tidak kira walau di mana anda berada – hari ini ialah hari yang dinanti-nanti, untuk diperdengarkan segala banyak perkhabaran baik, yang insya-Allah membawa kelegaan kepada semua.

Datuk Yang di-Pertua,

4. Merujuk kepada titah, Kebawah Duli Yang Maha Mulia Seri Paduka Baginda Yang di-Pertuan Agong Ke-16, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah, Baginda telah menzahirkan nasihat buat pedoman kita semua. Baginda mengingatkan, semua pihak untuk **mengenepikan segala perbezaan, serta bersatu padu** dalam usaha membanteras pandemik COVID-19. Sesungguhnya Kerajaan

amat menghargai titah dan sokongan Seri Paduka Baginda Yang di-Pertuan Agong, bahawa Belanjawan 2021 adalah amat penting, bagi memelihara **kesejahteraan rakyat dan negara.**

5. Maka dengan rendah dirinya, saya mengajak rakan-rakan Yang Berhormat untuk menghayati dan menilai pembentangan Belanjawan ini dengan **semangat perpaduan, hati terbuka dan berjiwa besar.**

## **PRESTASI DAN CABARAN EKONOMI 2020**

Datuk Yang di-Pertua,

6. Tahun 2020 bagi Malaysia dipenuhi dengan peristiwa mencabar. Tidak pernah lagi, dalam sejarah moden manusiawi, sejenis wabak memberi impak begitu besar sekali. Penularan COVID-19 bukan sahaja meragut nyawa, malah turut menjerut ekonomi negara-negara sedunia. Tiada garis panduan mahupun sebarang petunjuk lampau yang boleh dijadikan rujukan, kerana ***this is an unprecedented crisis***, dengan izin.
7. Krisis ini memberi kejutan permintaan dan penawaran, mengganggu rantaian bekalan serta menekan ekosistem perniagaan. Kita juga terpaksa berhadapan dengan ketidaktentuan persekitaran luar, kejatuhan harga komoditi dan ruang fiskal yang terhad.
8. Tabung Kewangan Antarabangsa atau IMF mengunjurkan, ekonomi global mencatat pertumbuhan negatif di paras 4.4 peratus pada tahun ini. Perdagangan dunia juga dijangka merosot pada kadar 10.4 peratus. Krisis yang berlaku pada masa ini turut menjejaskan ekonomi di lebih 150 buah negara. Ia merupakan **krisis ekonomi terburuk sejak era *the Great Depression*** pada sekitar tahun 1930-an.
9. Sejak awal lagi, **Kerajaan telah meletakkan keutamaan melindungi rakyat melebihi segala perkara lain.** Itulah sebabnya Kerajaan bertindak

melaksanakan Perintah Kawalan Pergerakan atau PKP, walaupun kita tahu tindakan selama hampir dua bulan ini memberi kesan mendadak kepada aktiviti ekonomi dan sosial rakyat. Sewaktu itu, Bank Negara Malaysia menganggarkan negara mengalami kerugian di antara 2.0 hingga 2.4 bilion ringgit sehari dengan penutupan ekonomi.

10. Bagi mengimbangi antara kewajiban melindungi rakyat dan menjamin kelangsungan ekonomi, Kerajaan perlu bertindak pantas. Oleh itu, pelan pemulihan ekonomi secara berfasa telah diperkenalkan menggunakan **pendekatan 6R** iaitu *Resolve, Resilience, Restart, Recovery, Revitalize* dan *Reform*.
11. Semasa peringkat *Resolve* atau Ketegasan, **tumpuan Kerajaan adalah untuk meratakan lekuk jangkitan COVID-19**. Sementara itu, ketika peringkat *Resilience* atau Ketahanan, pakej PRIHATIN dan PRIHATIN PKS Tambahan bernilai 260 bilion ringgit telah diperkenalkan bagi menangani kesan penutupan ekonomi. Bermula Mei 2020, setelah lekuk jangkitan COVID-19 berjaya diratakan, kita memasuki fasa *Restart* atau Memulakan Semula yang menyaksikan pembukaan semula ekonomi secara beransur-ansur. Selanjutnya, negara beransur ke peringkat *Recovery* atau Pemulihan, di mana Kerajaan menggerakkan pakej rangsangan PENJANA berjumlah 35 bilion ringgit dan KITA PRIHATIN bernilai 10 bilion ringgit. Keseluruhan pakej rangsangan yang diumumkan Kerajaan bernilai 305 bilion ringgit atau 20.7 peratus daripada KDNK.
12. **Agensi LAKSANA** telah ditubuhkan bagi memastikan pelaksanaan pakej rangsangan dibuat dengan cekap, telus dan berpandukan data. Berdasarkan kaji selidik LAKSANA tentang keberkesanan pakej PRIHATIN, lebih 80 peratus daripada 11 ribu responden didapati berpuas hati. Saya berterima kasih kepada LAKSANA dan lebih 53 agensi Kerajaan yang telah berganding bahu, berkongsi data, dan bekerjasama erat dalam memastikan pelaksanaan pakej-pakej rangsangan ini.

13. Segala inisiatif yang dilaksanakan merupakan *counter-cyclical measures*, bertujuan mengurangkan dampak COVID-19. Alhamdulillah, kita dapat melihat pertumbuhan **KDNK negara telah menunjukkan tanda-tanda pemulihan** daripada negatif 28.6 peratus pada April 2020 kepada negatif 3.2 peratus pada Jun. Anggaran awal KDNK bagi bulan Julai hingga September turut menunjukkan tren pemulihan yang memberangsangkan.
14. Sehubungan itu, mengambil kira persekitaran semasa, pertumbuhan ekonomi tahun 2020 telah disemak semula dan dianggar menyusut sebanyak 4.5 peratus. **Pada tahun 2021** pula, ekonomi negara dijangka kembali pulih dan **berkembang pada kadar antara 6.5 hingga 7.5 peratus**. Ini sejajar dengan langkah proaktif yang diambil oleh Kerajaan melalui pakej rangsangan ekonomi, inisiatif Belanjawan 2021 selain disokong oleh pertumbuhan ekonomi global yang diunjur lebih baik iaitu sebanyak 5.2 peratus.
15. Suatu yang penting untuk disedari, **kita telah membuktikan kepada masyarakat dunia yang Malaysia mampu menguruskan ekonominya dalam keadaan mencabar apa sekalipun**. Baik dalam sukar lebih lagi senang. Natijah dari pengalaman melalui pelbagai krisis ekonomi sebelum ini kita tempa menjadi pasak iltizam yang mengikat kita: untuk teguh berikhtiar, bijak kala bertindak, dan yakin pada gemblengan usaha.
16. Saya cukup tersentuh dengan semangat **#KitaJagaKita** dalam kalangan rakyat Malaysia – saya ingat saudara Rosnizam Ishak, berasal dari Bertam, yang memulakan perniagaan kambing perap menggunakan duit Bantuan Prihatin Nasional dan mewujudkan peluang pekerjaan kepada penduduk setempat; ada juga Encik Pajan Singh a/l Kirpal Singh, yang menyediakan penginapan percuma untuk barisan hadapan yang bertugas di Kuantan dalam tempoh PKP sehingga PKPP; dan Puan Michelle Kugan, usahawan barangan kristal dan mutiara, yang memanfaatkan pinjaman mikro di bawah TEKUN untuk terus mengekalkan perniagaan beliau di Tuaran, Sabah. Atas semangat dan kudrat

inilah Belanjawan 2021 telah dirangka untuk rakyat Malaysia dan bertemakan, **“Teguh Kita, Menang Bersama”**.

## **MATLAMAT BELANJAWAN 2021**

Datuk Yang di-Pertua,

17. Dalam merangka Belanjawan 2021, **buat pertama kalinya, siri jelajah dan sesi konsultasi ke seluruh negara telah dilaksanakan** merentasi 14 buah negeri, lebih 38 sesi dialog melibatkan lebih 40 bidang perniagaan dan perusahaan. Kementerian Kewangan telah mengadakan sesi libat urus bersama kepimpinan Kementerian Kerajaan Persekutuan, kepimpinan Kerajaan Negeri, *captains of industry*, ahli-ahli akademik, badan-badan bukan kerajaan (NGO), pemimpin parti politik dan yang paling utama pelbagai lapisan rakyat Malaysia dari belia, wanita, ibu bapa hingga warga emas. Saya ingin **merakamkan jutaan penghargaan kepada semua pihak** yang telah meluangkan masa dan mengemukakan idea serta cadangan.
  
18. Sehubungan itu, Belanjawan 2021 yang merupakan peringkat ke-5 strategi 6R iaitu *Revitalize* atau memperkasa, dirangka berdasarkan **Tiga Matlamat Induk**:  
  
Pertama: **Kesejahteraan Rakyat**;  
Kedua: **Kelangsungan Perniagaan**; dan  
Ketiga: **Ketahanan Ekonomi**
  
19. Kesemua matlamat ini merupakan **kesinambungan kepada pakej PRIHATIN, PRIHATIN PKS TAMBAHAN, PENJANA dan KITA PRIHATIN**. Selain daripada pendekatan yang lebih bersasar, Kerajaan juga akan mengimbangi kemampuan kewangan Kerajaan, keseimbangan pembangunan antara wilayah dan bandar, serta mengangkat nilai-nilai murni membentuk ekonomi yang kita idamkan melalui Belanjawan ini.

## **MATLAMAT PERTAMA: KESEJAHTERAAN RAKYAT**

Datuk Yang di-Pertua,

20. Matlamat pertama iaitu **Kesejahteraan Rakyat** akan dimanifestasikan secara holistik. Memahami permasalahan dan keresahan rakyat ialah perkara asas. Kesejahteraan rakyat kekal kepentingan paling utama. *Seikat bak sirih, serumpun bak serai.*

### **Strategi 1: Pandemik COVID-19 dan Kesihatan Awam**

21. Strategi pertama ialah perjuangan kita untuk **memerangi pandemik COVID-19 dan melindungi kesihatan awam**. Dalam bulan Ogos lalu, Ahli-ahli Yang Berhormat telah bersatu hati meluluskan dua akta penting bagi menangani COVID-19.
22. Yang pertama ialah Akta Langkah-langkah Sementara Bagi Mengurangkan Kesan Penyakit Koronavirus 2019 (COVID-19) 2020. Akta ini memberi pengecualian atau *relief* kepada rakyat yang tidak mampu memenuhi obligasi kontraktual seperti pembayaran sewa akibat penularan wabak ini. Pusat Mediasi COVID-19 juga ditubuhkan khusus untuk membantu kumpulan B40 dan M40 serta perusahaan mikro yang bertikai berhubung obligasi kontraktual.
23. Manakala Akta Langkah-langkah Sementara Bagi Pembiayaan Kerajaan (Penyakit Koronavirus 2019) pula membenarkan **had statutori hutang Kerajaan dinaikkan sementara sehingga 60 peratus** daripada KDNK berbanding 55 peratus. Di bawah Akta ini, Parlimen telah meluluskan siling peruntukan 45 bilion ringgit bagi Kumpulan Wang COVID-19.
24. Ketika Akta tersebut dibentangkan, terdapat panggilan daripada Ahli-ahli Yang Berhormat untuk meningkatkan siling Kumpulan Wang COVID-19. Mengambil kira gelombang wabak terkini dan keperluan sehingga tahun 2022, Kerajaan bercadang mengemukakan pindaan Jadual Akta tersebut kepada Dewan yang mulia ini untuk **menaikkan siling Kumpulan Wang COVID-19 sebanyak 20**

**bilion ringgit kepada 65 bilion ringgit.** Tujuan utamanya adalah untuk membiayai pakej KITA PRIHATIN, bantuan tambahan bagi kesejahteraan rakyat, keperluan barisan hadapan dan perolehan vaksin kelak. Saya berharap Ahli-ahli Yang Berhormat sama-sama menyokong cadangan ini.

Datuk Yang di-Pertua,

25. Tahun ini, Kerajaan telah memperuntukkan 1.8 bilion ringgit bagi pelaksanaan kawalan pergerakan serta keperluan perkhidmatan kesihatan awam berkaitan COVID-19 antaranya untuk membeli Kelengkapan Perlindungan Diri atau PPE, reagen dan bahan guna habis.

26. Bagi tahun hadapan, sebanyak **1 bilion ringgit lagi akan diperuntukkan untuk membendung gelombang ketiga COVID-19.** Peruntukan ini antaranya merangkumi:

Pertama: 475 juta ringgit bagi pembelian bekalan reagen, kit saringan dan bahan guna habis khusus untuk kegunaan Kementerian Kesihatan atau KKM;

Kedua: 318 juta ringgit bagi penyediaan peralatan PPE dan *hand sanitiser* kepada petugas barisan hadapan KKM;

Ketiga: 150 juta ringgit kepada Agensi Pengurusan Bencana Negara bagi menyelaras usaha memerangi COVID-19;

Keempat: 50 juta ringgit bagi perolehan peralatan, bekalan ujian makmal dan ubat-ubatan di Hospital Pengajar Universiti; serta

Kelima: Menambah peralatan pengoperasian fasiliti pergigian, perkhidmatan klinik secara maya serta penyediaan fasiliti zon saringan dan termometer di kemudahan kesihatan bagi memenuhi SOP norma baharu.



27. Kerajaan menghargai pengorbanan dan keringat petugas barisan hadapan dalam mengendalikan wabak COVID-19 ini. Sejak Mac lalu, Kerajaan telah memberikan Elaun Khas COVID-19 sebanyak 600 ringgit sebulan kepada barisan hadapan KKM dan ia akan diteruskan sehingga ancaman pandemik ini berjaya diatasi. Sebagai tambahan, Kerajaan bersetuju untuk melaksanakan **pemberian one-off sebanyak 500 ringgit** bagi menghargai jasa anggota barisan hadapan KKM yang dijangka memanfaatkan 100 ribu petugas kesihatan.

Datuk Yang di-Pertua,

28. *The war is not over until and unless an affordable and accessible vaccine is available.* **Kerajaan komited untuk mendapatkan sumber vaksin COVID-19** antaranya melalui penyertaan ke dalam program *COVID-19 Vaccine Global Access* atau COVAX. Dijangkakan, bekalan vaksin COVID-19 melibatkan kos melebihi 3 bilion ringgit untuk memenuhi keperluan rakyat Malaysia.

29. Selain itu, bagi menggalakkan rakyat mendapatkan vaksinasi mencegah penularan penyakit, Kerajaan bersetuju untuk meluaskan **skop pelepasan cukai bagi perbelanjaan rawatan perubatan meliputi perbelanjaan vaksinasi** seperti pneumokokal, influenza serta COVID-19. Pelepasan cukai ini diberi ke atas perbelanjaan vaksinasi bagi diri sendiri, pasangan dan anak-anak terhad kepada 1,000 ringgit.

30. Kerajaan juga akan **menaikkan had pelepasan cukai ke atas perbelanjaan rawatan perubatan diri, pasangan dan anak** bagi penyakit serius daripada 6,000 kepada 8,000 ringgit dan had pelepasan cukai bagi skop perbelanjaan pemeriksaan kesihatan penuh dinaikkan daripada 500 kepada 1,000 ringgit.

31. Sebagai tambahan, **had pelepasan cukai ke atas perbelanjaan bagi rawatan perubatan, keperluan khas dan penjagaan ibu bapa juga dinaikkan** dari 5,000 kepada 8,000 ringgit.

32. Dalam tempoh pandemik ini juga, Kerajaan menerima maklum balas bahawa masalah mental antara isu serius yang dihadapi masyarakat. Talian Sokongan Psikososial Kementerian Kesihatan telah menerima lebih 35 ribu panggilan telefon sejak Mac hingga Oktober 2020 yang antaranya mengenai masalah tekanan perasaan, kegelisahan dan kemurungan. Maka, peruntukan 24 juta ringgit disediakan bagi menangani isu ini termasuk melalui pengukuhan **Program Kesihatan Mental, Pencegahan Keganasan dan Kecederaan serta Penyalahgunaan Substans.**

Datuk Yang di-Pertua,

33. Setakat 31 Oktober 2020, mySalam telah membayar tuntutan berkaitan hospitalisasi dan penyakit kritikal sebanyak 64 juta ringgit kepada 56 ribu pesakit. Di samping itu, 19 ribu individu telah menerima pampasan berjumlah 11 juta ringgit disebabkan COVID-19. Bagi menambah baik program ini, Kerajaan akan **memperluas perlindungan mySalam** ke atas tuntutan kos peranti perubatan seperti *stent* untuk jantung atau prostesis.
34. Selain daripada perlindungan kesihatan, Kerajaan juga bercadang memperluas perlindungan sosial kepada golongan B40 melalui **Program Baucar Perlindungan Tenang**. Melaluinya, setiap penerima bantuan B40 akan diberi baucar 50 ringgit sebagai bantuan kewangan untuk membeli produk Perlindungan Tenang termasuk takaful hayat dan kemalangan diri. Dalam masa yang sama, Kerajaan juga melanjutkan tempoh pengecualian duti setem ke atas semua produk Perlindungan Tenang dengan sumbangan tahunan tidak melebihi 100 ringgit untuk tempoh 5 tahun lagi sehingga tahun taksiran 2025.

Datuk Yang di-Pertua,

35. Segmen kesihatan awam lain juga akan diberi tumpuan. Oleh itu, Kerajaan akan melaksanakan **program imunisasi pneumokokal** untuk kanak-kanak

dengan peruntukan 90 juta ringgit yang dijangka memanfaatkan 500 ribu kanak-kanak. Selain itu, sebanyak 6 juta ringgit turut diperuntukkan untuk **perolehan ubat biologik bagi pelbagai jenis penyakit rheumatologi seperti *rheumatoid arthritis*.**

36. Kerajaan juga memperuntukkan 25 juta ringgit bagi **program rawatan *Peritoneal Dialysis*** di rumah bertujuan meningkatkan kualiti rawatan pesakit buah pinggang serta mengurangkan masa menunggu dan kesesakan di hospital.